

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 17/11), člana 33. Poslovnika o radu Državne regulatorne komisije za električnu energiju (“Službeni glasnik BiH”, broj 2/05) i čl. 16. i 38. Pravilnika o licencama (“Službeni glasnik BiH”, broj 38/05), Državna regulatorna komisija za električnu energiju, na sjednici održanoj 22. februara 2012. godine, donijela je

## **ODLUKU**

### **O IZDAVANJU PRIVREMENE LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM**

1. Izdaje se privremena licenca Društvu ČEZ BiH d.o.o. Sarajevo za obavljanje djelatnosti međunarodne trgovine električnom energijom.
2. Privremena licenca iz tačke 1. ove odluke izdaje se za period od 1. marta 2012. godine do 28. februara 2014. godine.
3. Sastavni dio licence su Uvjeti za korištenje privremene licence za obavljanje djelatnosti međunarodne trgovine električnom energijom.
4. Ova odluka stupa na snagu danom donošenja i bit će objavljena u “Službenom glasniku BiH” i službenim glasilima entiteta.

### *Obrazloženje*

ČEZ Bosna i Hercegovina, Društvo sa ograničenom odgovornošću, Sarajevo (u daljem tekstu: ČEZ BiH d.o.o. Sarajevo) podnio je Državnoj regulatornoj komisiji za električnu energiju (u daljem tekstu: DERK) zahtjev zaprimljen pod brojem: 05-28-12-343/11 od 16. novembra 2011. godine za izdavanje licence za obavljanje djelatnosti međunarodne trgovine električnom energijom.

Podnosilac zahtjeva je bio vlasnik početne, odnosno privremene licence za obavljanje djelatnosti međunarodne trgovine u dvogodišnjem trajanju, upisane u Registar licenci kod ove Komisije pod registracijskim brojem: 05-28-358-18/08 od 29. decembra 2008. čije trajanje je isteklo 31. decembra 2010. godine. Kao vlasnik licence je shodno članu 38. Pravilnika o licencama (“Službeni glasnik BiH”, broj 38/05) bio u obavezi najkasnije 180 dana prije isteka privremene licence podnijeti zahtjev za izdavanje nove licence. Okolnost da to nije blagovremeno učinio od utjecaja je da mu temeljem zahtjeva podnijetog 16. novembra 2011. godine ne može biti odobrena nova licenca u trajanju dužem od vremenskog perioda koje je već koristio. Isti propust je imao jednak učinak i u pogledu ishoda rješavanja podnosiocjevog zahtjeva za dodjelu dozvole za obavljanje djelatnosti snabdijevanja električnom energijom drugog reda na teritoriji BiH od strane Regulatorne komisije za električnu energiju u Federaciji BiH.

Zahtjev ČEZ BiH d.o.o. Sarajevo je podnijet na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnijeti uz zahtjev ili predočavani naknadno na zahtjev DERK–a, omogućili DERK–u da razumije, razmotri i odluči o podnijetom zahtjevu. U ovom smislu, u skladu sa članom 8. stav 2. Pravilnika o licencama, DERK je obavijestio podnosioca zahtjeva svojim aktom broj: 05-28-12-343-9/11 od 29. decembra 2011. godine.

Po pregledu i provjeri svih formalnih elemenata zahtjeva DERK je najprije, u skladu sa obavezom iz člana 10. Pravilnika o licencama, 5. januara 2012. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu i odredio rok do 20. januara 2012. godine za dostavljanje komentara javnosti na podnijeti zahtjev za izdavanje licence.

DERK je konstatirao da nisu dostavljani komentari javnosti u vezi podnietog zahtjeva za dodjelu privremene licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

DERK je izvršio provjeru podataka, dokumenata i informacija priloženih uz zahtjev i naknadno, i utvrdio da isti svjedoče o tehničkim, pravnim i finansijskim mogućnostima podnosioca zahtjeva da ispuni sve kriterije, uvjete i standarde propisane zakonom, pravilima i propisima DERK-a za dodjelu licence za obavljanje međunarodne trgovine, iako u toku regulatornog nadzora isteklog dvogodišnjeg perioda korištenja početne licence nije ostalo nezapaženo da neke od svojih obaveza i nije najurednije ispunjavao.

DERK je pripremljenu početnu verziju Uvjeta za korištenje privremene licence za obavljanje djelatnosti međunarodne trgovine od 25. januara 2012. godine učinio dostupnom podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj raspravi obavljenoj 1. februara 2012. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako su na održanoj općoj raspravi izostali bilo čiji komentari koji su mogli utjecati da neki od uvjeta za korištenje licence budu uređeni na drugačiji način, pripremljen je prijedlog da se zatražena licenca izda i dostavljen podnosiocu zahtjeva aktom DERK-a, broj: 05-28-12-343-25/11 od 3. februara 2012. godine. Ni u ostavljenom roku do 10. februara 2012. godine, podnosilac zahtjeva nije istakao bilo kakav komentar pa je bilo osnovano zaključiti da prijedlog smatra sačinjenim u skladu sa Zakonom o prijenosu, regulatoru i operatoru sistema električne energije u Bosni i Hercegovini i podzakonskim propisima koji reguliraju predmetnu materiju.

Na osnovu svega naprijed izloženog, te respektirajući i dokaz da je podnosilac zahtjeva prethodno ishodio dvogodišnju dozvolu Regulatorne komisije za električnu energiju u Federaciji Bosne i Hercegovine za obavljanje djelatnosti snabdijevanja električnom energijom drugog reda na teritoriji Bosne i Hercegovine, registracijski broj: 06-03-640/21/11 od 30. novembra 2011. godine, DERK je odlučio da ČEZ BiH d.o.o. Sarajevo još jedanput izda privremenu licencu za obavljanje djelatnosti međunarodne trgovine električnom energijom.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-12-343-26/11

22. februara 2012. godine

Tuzla

Predsjedavajući Komisije

Nikola Pejić